

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA KAKANJ
Općinsko vijeće**

Broj: 01/1-23-Z/18
Kakanj, 30.10.2018. godine

Z A P I S N I K

**sa 23. redovne sjednice Općinskog vijeća održane 30.10.2018. godine (utorak) u velikoj sali za
sastanke Općinskog vijeća sa početkom u 9:00 sati
(sažetak zapisnika)**

Nakon intoniranja himne Bosne i Hercegovine, 23. sjednicu Općinskog vijeća otvorio je Slaven Katičić, predsjedavajući Općinskog vijeća i pozdravio prisutne.

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Džemal Bećirhodžić, Aldin Šljivo, Edin Aliefendić, Mejrema Purišević, Izudin Hrusto, Adnan Ibrahimspahić, Amar Selimović, Safet Šahman, Nadina Kovač, Senad Alajbegović i Muhamed Kubat
(SDA)

Semir Mušija, Mirnes Merdić, Mugdin Gorak i Rizah Haračić (naknadno pristupio) **(SBB BiH)**

Fahrudin Buza, Adisa Škulj, Zerina Kovač, Rešad Merdić i Mirsad Tursum **(S BiH)**

Enes Piljug, Ahmed Begić i Eldin Mioč (naknadno pristupio) **(SDP BiH)**

Slaven Katičić i Ivica Petrović **(HDZ BiH)**

Sedmedin Amidić **(DF)**

Elvedin Delić (naknadno pristupio) **(A-SDA)**

Nusret Muslić **(samostalni vijećnik)**

Mujo Fafulić **(nacionalne manjine)**

Odsutni vijećnici: Jasmin Mušanović **(SBB)**

Predsjedavajući je konstatovao da je na sjednici u momentu prijave prisutno 26 vijećnika i vijećnice, te da su se stekli svi potrebni uvjeti za validan rad i odlučivanje Općinskog vijeća.

Pored vijećnika sjednici su prisustvovali:

Nermin Mandra, općinski načelnik

Ferdo Mijač, sekretar Općinskog vijeća

Mirza Fazlić, pomoćnik općinskog načelnika za privredu, urbanizam i zaštitu okoline

Džihad Berbić, pomoćnik općinskog načelnika za finansije

Rešad Zaimović, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

Nurčo Kurtović, pomoćnik općinskog načelnika za imovinsko-pravne, geodetske poslove i katastar nekretnina

Nurudin Hrusto, pomoćnik općinskog načelnika za civilnu zaštitu

Bahrudin Arnaut, pomoćnik općinskog načelnika za opću upravu, radne i zajedničke poslove, lokalnu samoupravu i mjesne zajednice – po ovlaštenju

Zijad Neimarlija, direktor Zavoda za planiranje i izgradnju općine Kakanj

Izviestioci, obrađivači, gosti:

Mirnes Bajtarević, direktor JP „Grijanje“ d.o.o. Kakanj
Haris Veispahić, v.d. direktor JP „Vodokom“ d.o.o. Kakanj
Helmina Murtić, direktorica JU „Mladost“ Kakanj
Mirsada Čaluk, predsjednica UO JU „Mladost“ Kakanj
Međid Bajrić, predsjednik Komisije za provođenje projekta Program rješavanja stambenog problema Roma na području općine Kakanj

Predstavnici medija:

NTV IC Kakanj
Radio Kakanj
„Kakanjske novine“

„Naša riječ“
„Kakanjlive“
„Kakanj-x“

„Kaportal“
„Klix portal“

Kratka saopćenja o radu sjednice i prethodnim pitanjima:

Kolegij Općinskog vijeća je 22.10.2018. godine, održao 23. sjednicu na kojoj je razmatrao:

- a. **Zahtjev Melihe Neimarlija za izmjenom Odluke o utvrđivanju registra naziva ulica, trgova i mostova na području općine Kakanj.** Kolegij je navedeni zahtjev zaključkom proslijedio na dalje postupanje Komisiji za utvrđivanje registra naziva ulica, trgova i mostova na području općine Kakanj.
- b. **Molbu Hafize Zaimović.** Kolegij je molbu imenovane zaključkom proslijedio na dalje postupanje Službi za imovinskopravne, geodetske poslove i katastar nekretnina.
- c. **Molbu MZ Kraljeva Sutjeska.** Kolegij je navedenu molbu zaključkom proslijedio na dalje postupanje Službi za finansije i Odsjeku za mjesne zajednice.

Predsjedavajući je napomenuo vijećnike da im je dostavljen zahtjev Skupštine ZDK za dostavu prijedloga za Program rada Skupštine ZDK za 2019. godinu, te je napomenuo da se prijedlozi dostave u Stručnu službu za poslove Općinskog vijeća do 20.11.2018. godine, kako bi se objedinjen akt uputio prema Skupštini ZDK.

Usvajanje zapisnika sa 22. sjednice Općinskog vijeća:

Predsjedavajući je zapisnik sa 22. sjednice Općinskog vijeća stavio na razmatranje i obzirom da nije bilo prijavljenih diskutanata isti je usvojen sa 25 glasova za, bez glasova protiv i uzdržan.

Komentari na dostavljene odgovore na vijećnička pitanja:

Safet Šahman: rekao je da je na prošloj sjednici OV postavio vijećničko pitanje koje se odnosilo na dolazak općinskih službenih lica za obilazak terena, konkretnije dionicu puta za Brnjic, sa posebnim osvrtom na lokaciju kamenoloma „Trgošped“, između dva mosta, kako bi sagledali odakle dolazi zemljani materijal i zatvara korito rijeke. Općinska vodna inspekcija mu je uputila odgovor, navodeći da je izvršen nadzor u više navrata na navedenoj lokaciji, te da nisu u mogućnosti sa sigurnošću utvrditi otkud dolazi pomenuti materijal. Vijećnik Šahman smatra da je takva vrsta odgovora neshvatljiva. Dalje, navodi kako smatra da nadležni ne žele imenovati odgovornog krivca, te ako je tako, zahtjeva da se uputi inicijativa prema Kantolanoj inspekciji, u kojoj postoji organ koji će izaći na teren i koji će provjeriti da li se poštuju odredbe iz okolinske dozvole.

Enes Piljug: je rekao da je dobio odgovor na pitanje kojim je tražio odgovor od Biroa za zapošljavanje Općine Kakanj, o broju prijavljenih osoba na Biro. Rekao je da iz odgovora koji je dostavljen, se može zaključiti da se ništa bitno nije promijenilo kroz godine. Navodi, da se prema dostavljenom izvještaju vidi koliko se vodi briga o nezaposlenim licima na području općine. Smatra, da pored tolikog broja firmi, treba povesti računa o ljudima koji čekaju posao. Iznio je i podatak da Kakanj spada među prve gradove ZE-DO kantona, po broju nezaposlenih.

Rizah Haračić: na postavljeno vijećničko pitanje koje se odnosilo na događaj od 05.06.2018. godine, Haračić navodi da je isto upućeno Federalnoj Upravi za inspekcije poslove, u kojem oni traže monitoring

od Tvornice Cementa Kakanj, te navodi da smatra kako je mogla i naša mjerna stanica utvrditi krivca za prekoračene vrijednosti. Međutim, on smatra da treba odrediti odgovorne i iste sankcionirati, kako se ne bi desila ponovna katastrofa. Navodi da naša mjerna stanica treba biti postavljena tako da može utvrditi koji operater je prekoračio dozvoljenu emisiju.

Komentari na dostavljena mišljenja na vijećničke inicijative:

Enes Piljug: na inicijativu koju je podnio za asfaltiranje dvije dionice puta, tačnije od O.Š. Rošćevina do Popara i od skretanja za Sopotnicu do Gornje Jehovine, je dobio odgovor od Službe za privredu, urbanizam i zaštitu okoline, kako nisu nadležni za istu. Navodi kako nije inicirao na koju službu inicijativa treba ići, te je zatražio od Stručne službe za poslove Općinskog vijeća, da se ista inicijativa prosljedi Zavodu za planiranje i izgradnju.

Vijećnička pitanja:

Safet Šahman: je postavio dva vijećnička pitanja, jedno se odnosi na pojednostavljenje procedure izdavanja urbanističkih saglasnosti za javne projekte, odnosno projekte MZ i zašto se izdaju privremene, odnosno uslovne saglasnosti Elektrodistribucije, ŠPD-a, Telekoma i dr. Drugo pitanje je zašto nije došlo do sanacije ograde na mostu kod ambulante u izgradnji u Krševcu, a niti do realizacije bilo kojeg projekta predviđenog Budžetom za 2018. godinu.

Rizah Haračić: je postavio dva vijećnička pitanja i oba se tiču MZ Dumanac. Prvo se tiče projekta rasvjete u MZ Dumanac i informacije u kojoj fazi je realizacija istog, te po kojem projektu se radi, a drugo pitanje koje je ujedno i molba se odnosi na to da svi projekti koji se rade, pa tako i trenutna rekonstrukcija ceste u MZ Dumanac, prvenstveno treba da se kontaktira savjet MZ i poštuju izneseni stavovi.

Enes Piljug: je postavio pitanje da li je legalna deponija za otpad uz rijeku Ribnicu, od skretanja za Subotinje do kamenoloma Trgošped. Napomenuo je da je na 20-oj sjednici OV, podnio vijećničku inicijativu za uklanjanje raznog otpada sa obale rijeke Ribnice sa navadene lokacije, gdje je dobio pozitivan odgovor od Službe za privredu, urbanizam i zaštitu okoline, da će riješiti taj problem. Međutim, poslije toga do danas ništa nije riješeno, samo se povećao intenzitet odlaganja otpada i uništavanja obale i korita rijeke Ribnice. Traži od navedene službe da kaže zbog čega nije ispoštovano dato obećanje i razlog što je stanje još gore.

Ahmed Begić: je postavio vijećničko pitanje koje se tiče jednosmjernog saobraćaja u mjestu Dobojsko polje i zahtjeva da ukoliko nije ovaj propis postavljen po pravilima, da se isti stavi van snage.

Mirza Fazlić (odgovor): je rekao da je predmetno rješenje stavljeno van snage u petak, 26.10.2018. godine.

Nusret Muslić: je postavio pitanje koji su razlozi obustave redovnih autobuskih linija prema MZ Lipnica, Veliki Trnovci, Bištrani i dr., te koje je mjere neophodno poduzeti kako bi se ove redovne autobuske linije ponovo uspostavile.

Sedmedin Amidžić: je postavio vijećničko pitanje koje se odnosi na nedavno obavljeno numerisanje stambenih objekata u naseljenim mjestima. Smatra da postoji problem među građanima, u pogledu Zakon o prebivalištu, zbog promjene numeracije prebivališta, što iziskuje troškove na strani građana, te pita ko će izvršavati pomenutu promjenu, nadležni organi ili građani pojedinačno.

Općinski načelnik (odgovor): je rekao da je posao numeracije stambenih objekata i uređivanje naziva novih ulica i naselja je veoma obiman i zahtjevan posao. On zahtjeva duži vremenski period od neke dvije-tri godine, te je zamisao da se građani neforsiraju u zamjeni dokumenata i svega ostalog, u slučajevima gdje je došlo ili će doći do promjena adresnih podataka. Svjesni smo da ovaj posao iziskuje i određene troškove za građane, ali i firme zbog promjene podataka u sudskom registru, ali je upravo zbog toga ideja da se ovaj posao radi osim ove, još dvije godine, pa da se potom ostavi mogućnost onima koji promjene trebaju izvršiti još jedna-dvije godine, da to učine. Rekao je da smatra da će u tom periodu građani i ostali imati potrebu da svakako mjenjaju dokumente ili vrše određene promjene u

evidencijama. Što se tiče sredstava koje bi Općina izdvojila za ovu potrebu, naveo je da ista nisu predviđena, upravo iz razloga naprijed navedenih. Još je naglasio značaj ovog posla za lokalnu zajednicu i zatražio strpljenje svih, dok se posao ne okonča, te je rekao da će se ubuduće prikrom izdavanja urbanističkih, odnosno građevinskih saglasnosti dodjeljivati brojevi objektima, kako bi se stanje po ovom pitanju stalno ažuriralo i bilo trajno uređeno.

Sedmedin Amidžić: je predložio da se pokuša Općina, odnosno nadležna služba obratiti agenciji IDDEEA, kako bi se eventualno općinskoj službi odobrio pristup potacima IDDEE-e, odnosno da služba vrši promjene u sistemu, gdje je do istih došlo, a na osnovu zvaničnih rješenja izdatih u postupku promjene ovih podataka.

Vijećničke inicijative:

Enes Piljug: je podnio inicijativu koja se tiče asfaltiranja dijela puta od džamije u Popima do mjesta Rivišće u dužini od 500 metara. Traži da se u Budžet za narednu godinu uvrsti ovaj projekat.

Rizah Haračić: je podnio dvije vijećničke inicijative. Prva se odnosi na formiranje stručnog tima, odnosno komisije koja bi pratila rad privrednih subjekata i rezultata mjerenja u procesau dobijanja okolinskih dozvola. Drugom inicijativom traži izgradnju priključka na regionalni put kod naplatnih kućica za MZ Dumanac i MZ Bičer. MZ Dumanac i MZ Bičer su imali saobraćajnicu koja im je ukinuta što se jasno može vidjeti i iz signalizacije postavljene na regionalnom putu.

Safet Šahman: je podnio dvije vijećničke inicijative. Prva se odnosi na održavanje sastanka između predstavnika MZ Brnjic, Krševac, Starposle i Dubovo Brdo, sa općinskim načelnikom i predstavnicima RMU Kakanj, TC Kakanj i Trgošped, te premijerom i resornim ministrima, a tiče se izgradnje puta za Brnjic. Drugom inicijativom traži da se iduća godina proglasi godinom izgradnje infrastrukture u ruralnim dijelovima općine Kakanj.

Utvrđivanje dnevnog reda:

Predsjedavajući je predložio dnevni red koji je usaglašen na sjednici Kolegija 22.10.2018. godine, odnosno dnevni red po pozivu za 23. sjednicu Općinskog vijeća.

U raspravi o predloženom dnevnom redu nije niko učestvovao, te je Vijeće sa 26 glasova za, bez glasova protiv i uzdržan usvojilo dnevni red za 23. sjednicu.

Usvojeni dnevni red:

1. Izvještaj o izvršenju Budžeta Općine Kakanj za period 01.01. – 30.06.2018. godine
2. Izvještaj o izvršenju Tekuće budžetske rezerve Budžeta Općine Kakanj za period 01.01. – 30.06.2018. godine)
3. Prijedlog izmjena i dopuna Budžeta Općine Kakanj za 2018. godinu
4. Prijedlog izmjene i dopune Programa utroška neraspoređenog dijela namjenskih sredstava od prihoda preduzeća ostvarenih radom termoelektrana za 2018. godinu i sredstva od prodaje poslovnih prostora
5. Prijedlog odluke o izmjenama Programa rasporeda sredstava za sport za 2018. godinu
6. Prijedlog odluke o izmjenama i dopunama Programa utroška namjenskih sredstava za zaštitu okoline općine Kakanj za 2018. godinu
7. Prijedlog odluke o izmjeni i dopuni Programa utroška namjenskih sredstava od koncesionih naknada za 2018. godinu
8. Prijedlog zaključka o davanju saglasnosti na dopune Plana redovnog održavanja javnih i nerazvrstanih cesta na području općine Kakanj za 2018. godinu
9. Prijedlog odluke o načinu i uslovima raspolaganja nekretnina – poslovnim prostorima u vlasništvu Općine Kakanj
10. Prijedlog rješenja o imenovanju Komisije za provođenje javnog nadmetanja – licitacije pri prodaji poslovnih prostora u vlasništvu Općine Kakanj
11. Prijedlog odluke o načinu i uslovima raspolaganja nekretninom – zamjena zemljišta
12. Prijedlog odluke o davanju saglasnosti za utvrđivanje namjene, parcelaciju mikrolokaliteta i formiranje građevinske čestice

13. Prijedlog odluke o davanju na korištenje stambene jedinice izgrađene na osnovu projekta „Program rješavanja stambenog problema Roma na području općine Kakanj“
14. Prijedlog odluke o izmjenama i dopunama prečišćenog teksta Odluke o zagrijavanju stambenog i poslovnog prostora u Kaknju daljinskim grijanjem i Uslova za isporuku i preuzimanje toplotne energije iz daljinskog grijanja
15. Prijedlog odluke o proglašenju Udruženja Razvojni centar općine Kakanj udruženjem od posebnog interesa
16. Informacija o stanju obaveza JP „Vodokom“ prema KfW kreditu
17. Prijedlog zaključka o usvajanju Izvještaja o realizaciji Godišnjeg programa rada JU za predškolski odgoj i obrazovanje „Mladost“ Kakanj za 2017/18 godinu
18. Prijedlog zaključka o davanju saglasnosti na Godišnji program rada JU za predškolski odgoj i obrazovanje „Mladost“ Kakanj za 2018/19 godinu
19. Prijedlog odluke o razrješenju Kristine Šain, članice OIK-a
20. Prijedlog odluke o objavljivanju javnog oglasa za imenovanje člana OIK-a
21. Prijedlog odluke o razrješenju Mahira Neimarlije, člana Skupštine JP „Grijanje“ d.o.o. Kakanj, na lični zahtjev
22. Prijedlog odluke o imenovanju člana Skupštine JP „Grijanje“ d.o.o. Kakanj na privremeni period do konačnog imenovanja

Tačka 1.

Izvještaj o izvršenju Budžeta Općine Kakanj za period 01.01. – 30.06.2018. godine

Predlagač: Općinski načelnik
Obrađivač: Služba za finansije
Izjavitelj: Džihad Berbić, pomoćnik općinskog načelnika
Stav i mišljenje: Komisija za budžet i finansije

U diskusiji nije niko učestvovao i Izvještaj o izvršenju Budžeta Općine Kakanj za period 01.01. – 30.06.2018. godine, je usvojen sa 19 glasova za, 4 protiv i 3 uzdržana.

Tačka 2.

Izvještaj o izvršenju Tekuće budžetske rezerve Budžeta Općine Kakanj za period 01.01. – 30.06.2018. godine

Predlagač: Općinski načelnik
Obrađivač: Služba za finansije
Izjavitelj: Džihad Berbić, pomoćnik općinskog načelnika
Stav i mišljenje: Komisija za budžet i finansije

U diskusiji nije niko učestvovao i Izvještaj o izvršenju Tekuće budžetske rezerve Budžeta Općine Kakanj za period 01.01. – 30.06.2018. godine, je usvojen sa 19 glasova za, 4 protiv i 4 uzdržana.

Tačka 3.

Prijedlog izmjena i dopuna Budžeta Općine Kakanj za 2018.godinu

Predlagač: Općinski načelnik
Obrađivač: Služba za finansije
Izjavitelj: Džihad Berbić, pomoćnik općinskog načelnika
Stav i mišljenje: Komisija za budžet i finansije

Izmjene i dopune Budžeta Općine Kakanj za 2018. godinu, su usvojene bez rasprave sa 20 glasova za, 4 protiv i 4 uzdržana.

Tačka 4.

Prijedlog izmjena i dopuna Programa utroška neraspoređenog dijela namjenskih sredstava od prihoda poduzeća ostvarenih radom termoelektrana za 2018. godinu i sredstva od prodaje poslovnih prostora

Predlagač: Općinski načelnik
Obrađivač: Služba za finansije
Izjavitelj: Džihad Berbić, pomoćnik općinskog načelnika
Stav i mišljenje: Komisija za budžet i finansije

U diskusiji nije niko učestvovao, te su Izmjene i dopune Programa utroška neraspoređenog dijela namjenskih sredstava od prihoda poduzeća ostvarenih radom termoelektrana za 2018. godinu i sredstva od prodaje poslovnih prostora, usvojene sa 20 glasova za, 4 protiv i 4 uzdržana.

Tačka 5.

Prijedlog odluke o izmjenama Programa rasporeda sredstava za sport za 2018. godinu

Predlagač: Općinski načelnik
Obrađivač: Služba za društvene djelatnosti, boraka pitanja, raseljena lica, izbjeglice i povratnike
Izjavitelj: Rešad Zaimović, pomoćnik općinskog načelnika
Stav i mišljenje: Komisija za mlade

U diskusiji su učestvovali: Rizah Haračić i Enes Piljug.

Rizah Haračić: je rekao da je još prilikom usvajanja ovog Programa na početku godine, predlagao da se namjenski opredjele (oboje) sredstva za omladinske selekcije svim sportskim klubovima, kako se ne bi dešavalo da krajem godine nedostaje sredstava za funkcionisanje omladinskih selekcija. Rekao je da sumnja da će se i ova dodatna sredstva odobrena izmjenama Programa za sport, utrošiti za razvoj i unapređenje rada omladinskih kategorija, te stoga ne podržava ovakav način finansiranja sportskih klubova, pa time niti izmjene Programa za sport.

Enes Piljug: je rekao da se u dobroj mjeri slaže sa stavom kolege Haračića, te istovremeno predlaže da se ostatak neraspoređenih sredstava za sport utroši na finansiranje rada i troškova takmičenja klubova borilačkih vještina, obzirom da se radi o masovnim sportovima i gdje se bilježe zapaženi takmičarski rezultati.

Rešad Zaimović (odgovor): je pojasnio da u Programu stoji da će se ostatak rezervnih sredstava iskoristiti prema iskazanim zahtjevima i potrebama klubova, što se činilo i do sada. Iz sredstava rezervi se uvijek nastojalo pomoći klubovima i takmičarima pojedincima pri odlasku na takmičenja i omogućavanju nesmetanog funkcionisanja klubova.

Rizah Haračić (replika): je naglasio da se njegovo izlaganje nije odnosilo na takmičare pojedince, nego na klubove, koji ne izvrše kvalitetno planiranje troškova funkcionisanja na početku godine, pa onda krajem godine se obraćaju zahtjevima za dodatna sredstva, što smatra da nije uredu, te da bi sa takvom praksom trebalo prestati.

Nakon diskusije, Vijeće je Odluku o izmjenama Programa rasporeda sredstava za sport za 2018. godinu, usvojilo sa 19 glasova za, 5 protiv i 3 uzdržana.

Tačka 6.

Prijedlog odluke o izmjenama i dopunama Programa utroška namjenskih sredstava za zaštitu okoline općine Kakanj za 2018. godinu

Predlagač: Općinski načelnik
Obrađivač: Služba za privredu, urbanizam i zaštitu okoline
Izjavitelj: Mirza Fazlić, pomoćnik općinskog načelnika
Stav i mišljenje: Komisija za ekologiju

U diskusiji nije niko učestvovao, te je Odluka o izmjenama i dopunama Programa utroška namjenskih sredstava za zaštitu okoline općine Kakanj za 2018. godinu, usvojena sa 20 glasova za, 5 protiv i 1 uzdržan.

Tačka 7.

Prijedlog odluke o izmjeni i dopuni Programa utroška namjenskih sredstava od koncesionih naknada za 2018. godinu

Predlagač: Općinski načelnik

Obrađivač: Zavod za planiranje i izgradnju općine Kakanj

Izvjestilac: Zijad Neimarlija, direktor Zavoda

U diskusiji su učestvovali: Enes Piljug i Rizah Haračić.

Enes Piljug: je tražio informaciju da li je izvršen tehnički prijem za putnu komunikaciju Zgošća-Tršće, te je rekao da je na sanaciju klizišta na tom putu već do sada uloženo mnogo sredstava, a da se ne zna pouzdano ko je kriv, odnosno šta je uzrok pojave klizišta, kao i da li neko može dati garanciju da su sredstva odobrena predmetnim izmjenama i dopunama programa, konačna. Uz to je tražio da mu se odgovori dokle je došao posao eksproprijacije zemljišta, na novoj putnoj komunikaciji Donji Kakanj-Brnjic i zbog čega se nije pristupilo prvoj fazi radova.

Rizah Haračić: je rekao da mu prije svega nije jasno iz izlaganja izvjestioca da li se mogu sredstva sa jednog konta prebacivati na drugi, pa potom ponovo dalje preusmjeravati, prije nego što Vijeće donese odluke o istom. Dalje je tražio da dobije informaciju o konačnoj sumi sredstava potrebnih za završetak puta za Tršće i to prema projektu, te je pitao šta je sa nekadašnjim putem, je li on zauvijek izgubljen ili postoje neke druge mogućnosti u vezi istog. Naglasio je da je svjestan problema, uzrokovanih klizištem, sa kojim se susreću ljudi koji svakodnevno saobraćaju tim putem.

Zijad Neimarlija (odgovor): je rekao da je osnovni projekat saobraćajnice za Tršće praktično završen, a trenutni radovi koji se izvode su sanacija nepredviđenih događaja iz januara ove godine, kada je došlo do odrona veće količine materijala na cestu, nakon čega su angažovani geolozi koji su utvrdili da se mora pristupiti sanaciji klizišta, za koje se pretpostavlja da je pokrenuto još 2014. godine. Što se tiče konačne sume sredstava, smatra da niko ne može kazati da su ova sredstva konačna, obzirom na stanje terena, ali se nada da bi trebalo da se ovim sredstvima završe radovi sanacije pomenutog klizišta. Po završetku ovih radova pristupit će se postavljanju zaštitne sigurnosne ograde, čime bi se moglo reći da je predmetna saobraćajnica u cijelosti završena i tada će se moći reći koliko su ukupno koštali radovi na istoj. Što se tiče pitanja vijećnika Piljuga oko puta Donji Kakanj-Brnjic, rekao je da nije moguće poduzimati bilo kakve radnje dok se ne riješi prethodno pitanje, a to je pitanje koncesionog ugovora kojeg treba da zaključi RMU „Kakanj“ sa kantonom, te je istakao da se nada kako će se to dogoditi do kraja godine.

Mirza Fazlić (odgovor): je rekao da po pitanju prebacivanja sredstava nisu donošene nikakve odluke, već se radi o prijedlozima za izmjenama Programa gdje bi se, ukoliko Vijeće iste usvoji, uvećana sredstva za zaštitu okoliša namjenski utrošila na izgradnju gradske saobraćajnice, a sredstva koja su za tu namjenu bila predviđena, a to su sredstva od koncesija koja su nenamjenska, bi se preusmjerila na put za Tršće.

Rizah Haračić: je rekao da je tražio podatak o konačnoj sumi sredstava potrebnih za završetak puta za Tršće, što podrazumjeva i završetak puta za Crnač, te priključak na put za Tršće, jer je to u prošlosti tako bilo. Još je naglasio da, koliko mu je poznato, na tom putu je došlo do spuštanja nekih kota, pa ga interesuje da li je uopće moguće put za Crnač priključiti na ovaj novotrasirani put za Tršće i koliko još sredstava za to treba, odnosno da li će se smatrati put završenim kad se izvrše svi priključci na put koji su ranije postojali.

Enes Piljug: je rekao da nije dobio odgovor u vezi tehničkog prijema puta za Tršće i smatra da je miniranje najveći uzrok pojave odrona i problema na putu za Tršće, a ne klizište koje se ovdje spominje. Još je rekao da smatra da se prva faza puta za Brnjic može raditi bez obzira na potpisivanje koncesionog ugovora od strane Rudnika.

Nakon diskusije, Vijeće je Odluku o izmjeni i dopuni Programa utroška namjenskih sredstava od koncesionih naknada za 2018. godinu, usvojilo sa 20 glasova za, 4 protiv i 3 uzdržana.

Tačka 8.

Prijedlog zaključka o davanju saglasnosti na dopune Plana redovnog održavanja javnih i nerazvrstanih cesta na području općine Kakanj za 2018. godinu

Predlagač: Općinski načelnik

Obrađivač: Zavod za planiranje i izgradnju općine Kakanj

Izjavitelj: Zijad Neimarlija, direktor Zavoda

U diskusiji nije niko učestvovao, pa je Zaključak o davanju saglasnosti na dopune Plana redovnog održavanja javnih i nerazvrstanih cesta na području općine Kakanj za 2018. godinu, usvojen sa 24 glasa za, 3 protiv i 1 uzdržan.

Tačka 9.

Prijedlog odluke o načinu i uvjetima raspolaganja nekretnina – poslovnim prostorima u vlasništvu Općine Kakanj

Predlagač: Općinski načelnik

Obrađivač: Služba za imovinskopravne, geodetske poslove i katastar nekretnina

Izjavitelj: Nurčo Kurtović, pomoćnik općinskog načelnika

Stavovi i mišljenja: Komisija za Statut i propise

Predsjedavajući je predložio da se diskusije po ovoj i narednoj tački dnevnog reda objedine, a da se izjašnjavanje obavi odvojeno, te je dao pauzu od 10 minuta, na prijedlog predsjednika Komisije za izbor i imenovanje.

U diskusiji nije niko učestvovao, pa je Vijeće Odluke o načinu i uvjetima raspolaganja nekretnina – poslovnim prostorima u vlasništvu Općine Kakanj, usvojilo sa 22 glasa za, 4 protiv i bez glasova uzdržan.

Tačka 10.

Prijedlog rješenja o imenovanju Komisije za provođenje javnog nadmetanja – licitacije pri prodaji poslovnih prostora u vlasništvu Općine Kakanj

Predlagač: Komisija za izbor i imenovanje

Obrađivač: Služba za imovinskopravne, geodetske poslove i katastar nekretnina

Izjavitelj: Edin Aliefendić, predsjednik Komisije za izbor i imenovanje

Po prijedlogu Komisije za izbor i imenovanje, Vijeće je donijelo Rješenje o imenovanju Komisije za provođenje javnog nadmetanja – licitacije pri prodaji poslovnih prostora u vlasništvu Općine Kakanj, u sastavu: Irma Helja – predsjednica, Elvedin Delić, Nadina Kovač, Nihad Bliznović, Armin Bašić, Ilhana Alajbegović i Ivica Petrović – članovi, sa 21 glasom za, 3 protiv i 1 uzdržan.

Tačka 11.

Prijedlog odluke o načinu i uvjetima raspolaganja nekretninom – zamjena zemljišta

Predlagač: Općinski načelnik

Obrađivač: Služba za imovinskopravne, geodetske poslove i katastar nekretnina

Izjavitelj: Nurčo Kurtović, pomoćnik općinskog načelnika

Stavovi i mišljenja: Komisija za Statut i propise

U diskusiji nije niko učestvovao, pa je Vijeće Odluku o načinu i uvjetima raspolaganja nekretninom – zamjena zemljišta, usvojilo jednoglasno sa 25 glasova za, bez glasova protiv i uzdržan.

Tačka 12.

Prijedlog odluke o davanju saglasnosti za utvrđivanje namjene, parcelaciju mikrolokaliteta i formiranje građevinske čestice

Predlagač: Općinski načelnik
Obrađivač: Služba za privredu, urbanizam i zaštitu okoline
Izjavitelj: Mirza Fazlić, pomoćnik općinskog načelnika
Stav i mišljenje: Komisija za Statut i propise

U diskusiji nije niko učestvovao, pa je Vijeće Odluku o davanju saglasnosti za utvrđivanje namjene, parcelaciju mikrolokaliteta i formiranje građevinske čestice, usvojilo sa 27 glasova za, bez glasova protiv i uzdržan.

Tačka 13.

Prijedlog odluke o davanju na korištenje stambene jedinice izgrađene na osnovu projekta „Program rješavanja stambenog problema Roma na području općine Kakanj“

Predlagač: Općinski načelnik
Obrađivač: Komisija za provođenje projekta „Program rješavanja stambenog problema Roma na području općine Kakanj“
Izjavitelj: Međid Bajrić, predsjednik Komisije
Stav i mišljenje: Komisija za ljudska prava i ravnopravnost spolova

U diskusiji nije niko učestvovao, pa je Vijeće Odluku o davanju na korištenje stambene jedinice izgrađene na osnovu projekta „Program rješavanja stambenog problema Roma na području općine Kakanj“, usvojilo sa 27 glasova za, bez glasova protiv i uzdržan.

Tačka 14.

Prijedlog odluke o izmjenama i dopunama prečišćenog teksta Odluke o zagrijavanju stambenog i poslovnog prostora u Kakanju daljinskim grijanjem i Uslova za isporuku i preuzimanje toplotne energije iz daljinskog grijanja

Predlagač: Skupština JP „Grijanje“ d.o.o. Kakanj
Obrađivač: Skupština JP „Grijanje“ d.o.o. Kakanj
Izjavitelj: Mirnes Bajtarević, direktor JP i Jasenko Beus, predsjednik Skupštine JP
Stav i mišljenje: Komisija za ljudska prava i ravnopravnost spolova

U diskusiji su učestvovali: Rizah Haračić i Ahmed Begić.

Rizah Haračić: je podržao predložene izmjene i dopune odluke, s prijedlogom da se u odluci smanji iznos fiksnog dijela obračuna za stanovništvo sa 30% na 10%, za korisnike koji grijanje plaćaju prema obračunu po utrošku, odnosno po kalorimetru. Smatra da je to pravedno i realno, obzirom da građani plaćaju kalorimetre po 800, 900 ili 1.000 KM, a onda potom plaćaju fiksni dio 30%, te smatra da bi se grijanje trebalo plaćati kao i voda, prema utrošku koji se izmjeri mjernim uređajem.

Ahmed Begić: je tražio od direktora Grijanja da mu kaže da li postoji mogućnost regulisanja plaćanja grijanja za stanove gdje vlasnici ne mogu da plaćaju iznose računa za grijanje, a koji se ne mogu pojedinačno isključiti zbog postojećeg sistema razvoda grijanja, pa takvi vlasnici kasnije bivaju tuženi i putem suda, pa mogu da ostanu čak i bez tih stanova. Također, pitao je postoji li mogućnost da se sprat kuće isključi sa gradskog grijanja, a da se na primjer, preostali dio kuće zagrijava. Sve navedeno ga interesuje iz razloga zaštite građana, koji bi u budućnosti mogli da ostanu bez svojih objekata, ali i zbog opravdanosti same svrhe postojanja gradskog grijanja.

Mirnes Bajtarević (odgovor): je ispravio vijećnika Haračića i naglasio da je cijena fiksnog dijela obračuna za stanovništvo 20%, koji iznos je Vijeće usvojilo, te je naglasio da cijena kalorimetra iznosi 390 KM, na kojem JP „Grijanje“ nema nikakve zarade, a uz sve postoji mogućnost da korisnici sami kupe uređaj određenih karakteristika, a da potom isti radnici Grijanja ugrade. Što se trajnog isključenje, ono nije moguće zbog toplotne ravnoteže cijelog objekta a i vertikalnih dovodnih cijevi koje prolaze kroz gotovo 80% stanova koji se nalaze na sistemu gradskog grijanja. Po pitanju tužbi i prinudne naplate, rekao je da JP svakako naplatu putem suda koristi kao zadnju varijantu, odnosno nastoji iznaći i iskoristiti sve mogućnosti prije nego što korisnika tuži, a kada do toga eventualno dođe opet se pokušava istima olakšati plaćanje kroz otpis kamata, plaćanje duga u ratama i dr.

Rizah Haračić: je rekao da mu nije poznato da je cijena kalorimetra snižena, jer je iz ranijih obračuna građana imao informaciju da ona iznosi koliko je ranije pomenuo, ali i pored toga smatra da je 10% fiksnog dijela dovoljno za pokrivanje osnovnih troškova rada radnika „Grijanja“, jer se taj trošak zaračunava samo korisnicima koji imaju ugrađena kalorimetre, dok oni koji plaćaju paušalno po kvadratu tog troška nemaju.

Mirnes Bajtarević (odgovor): je istakao da će JP „Grijanje“ već predmetnom izmjenom odluke izgubiti dio prihoda, tako da nije saglasan da se vrši korekcija fiksnog dijela obračuna, jer je ona već sada najniža u okruženju i regiji, te je naglasio da svi korisnici imaju mogućnost biranja kod načina plaćanja grijanja, paušalno po kvadratu ili putem utroška po kalorimetru.

Nakon diskusije, Vijeće je usvojilo Odluku o izmjenama i dopunama prečišćenog teksta Odluke o zagrijavanju stambenog i poslovnog prostora u Kaknju daljinskim grijanjem i Uslova za isporuku i preuzimanje toplotne energije iz daljinskog grijanja, sa 22 glasa za, 3 protiv i 2 uzdržana.

Tačka 15.

Prijedlog odluke o proglašenju Udruženja Razvojni centar općine Kakanj udruženjem od posebnog interesa

Predlagač: Općinski načelnik

Obrađivač: Služba za privredu, urbanizam i zaštitu okoline

Izvjestilac: Mirza Fazlić, pomoćnik općinskog načelnika

Općinski načelnik: je dao uvodno izlaganje po ovoj tački dnevnog reda i naglasio budući značaj razvojnog centra za općinu Kakanj. Rekao je da se prilikom formiranja razvojnog centra razmišljalo o modalitetima na koji način isti organizovati, tako da se došlo na ideju da se organizuje kao udruženje građana, koje bi trebalo biti partner Općini, prije svega u podnošenju aplikacija prema evropskim fondovima, koji su zaista zahtjevni pri odobravanju sredstava, dok mi u Općini nemamo kapaciteta za takve stvari i poslove. Predložio je da se ovaj prijedlog odluke malo konkretizuje po pitanju finansiranja troškova, na način da u odluci stoji da će Općina Kakanj finansirati troškove rada dvoje zaposlenih i rada kancelarije, te je predložio da se doda još jedan član koji bi propisivao obavezu podnošenja šestomjesečnih izvještaja o radu Općinskom vijeću.

Slaven Katičić: je rekao da je prisustvovao sastancima sa delegacijama Knina i Sofije i da podržava formiranje ovakvog razvojnog centra imajući u vidu budući značaj istog. Po pitanju predloženih korekcija predložene odluke, rekao je da smatra da u skladu sa Zakonom o udruženjima Općinsko vijeće nema mogućnost da traži podnošenje izvještaja o radu, pa je predložio da se u tom pravcu odluka koriguje na način da stoji da će Udruženje „Razvojni centar općine Kakanj“ podnositi šestomjesečne izvještaje nadležnoj službi Općine, Službi za privredu, urbanizam i zaštitu okoline, a šestomjesečnu informaciju o aktivnostima Općinskom vijeću, te da se konkretizuje finansiranje troškova rada kancelarije na način kako je to predložio općinski načelnik.

Nakon diskusije, Vijeće je uz naprijed navedene izmjene usvojilo Odluku o proglašenju Udruženja „Razvojni centar općine Kakanj“, udruženjem od posebnog interesa, sa 25 glasova za, bez glasova protiv i 3 uzdržana.

Tačka 16.

Informacija o stanju obveza JP „Vodokom“ prema KfW kreditu

Predlagač: Skupština JP „Vodokom“ d.o.o. Kakanj

Obrađivač: Skupština JP „Vodokom“ d.o.o. Kakanj

Izvjestilac: Haris Veispahić, v.d.direktora JP i Fahrudin Topalović, predsjednik Skupštine JP „Vodokom“

U diskusiji su učestvovali: Ahmed Begić, Edin Aliefendić, Rizah Haračić.

Ahmed Begić: je rekao da je prilikom podizanja kredita morao postojati plan na koji način vršiti otplatu kredita i da je negdje načinjena greška koju sada ovo Vijeće treba da ispravlja i preuzme obavezu

otplate kredita. On je tražio da se nađe krivac zašto JP ne može otplaćivati kredit, te je tražio od direktora da Vijeću obrazloži kako je došlo do aktualne situacije, te da objasni vijećnicima gdje su i na što tačno utrošena kreditna sredstva.

Edin Aliefendić: je podsjetio na hronologiju oko podizanja KfW kredita 2002. godine i rekao da su u tom periodu postojala dva preduzeća JP „Vodovod i kanalizacija“ i JP „Gradska čistoća“. Kredit je podignut od strane JP „Vodovod i kanalizacija“, koje je u tom periodu bilo perspektivno preduzeće i koje prema tadašnjem poslovanju uz predviđeno blago povećanje cijena usluga bilo sposobno otplaćivati kredit. Međutim, 2006. godine je donesena odluka od strane Vijeća da se naprijed pomenuta JP spoje u jedno preduzeće JP „Vodokom“, obzirom da je JP „Gradska čistoća“ bilo na rubu egzistencije. Od tog trenutka dolazi do problema u otplati kredita, jer novonastalo preduzeće iz godine u godinu radi na granici poslovanja i zbog toga nije u mogućnosti da uredno otplaćuje kredit. Predložio je da Vijeće ovu Informaciju o stanju obveza JP „Vodokom“ prema KfW kreditu primi k znanju, te predložio usvajanje dva zaključka i to: da Služba za finansije Općine Kakanj i JP „Vodokom“ do naredne sjednice OV, pripreme odluke o stavljanju van snage odluka OV i otplatnih planova kojima se stavlja na teret obaveza povrata dijela KfW kredita JP „Vodokom“ i drugi zaključak kojim se obavezuje Služba za finansije Općine Kakanj, da u prijedlogu Budžeta za 2019. godinu, planira potrebna sredstva za otplatu KfW kredita u 2019. godini.

Rizah Haračić: je rekao da smatra da se Vijeće ne bi trebalo baviti ko je i zašto kriv, nego je na Vijeću da iznađe rješenje za nastalu situaciju. Rekao je da se cijelo vrijeme mandata zalaže da sva JP i JU imaju isti tretman od strane Općine i podsjetio je da je cjelokupna rekonstrukcija sistema daljinskog grijanja finansirana iz Budžeta Općine. Predložio je da Vijeće prihvati Informaciju i da donese odluku da Općina Kakanj preuzme obavezu otplate KfW kredita, a da se paralelno s tim ulože maksimalni napor kod nadležnog ministarstva da se kredit otpiše. Još je ispravio vijećnika Aliefendića i rekao da su u trenutku spajanja preduzeća „Vodovod i kanalizacija“ i „Gradska čistoća“, oba bila u lošoj poslovnoj situaciji.

Haris Veispahić: je na pitanje vijećnika Begića rekao da nema ambiciju tragati ko je kriv za nastalu situaciju, odnosno da se na neki način odgovor na to pitanje nalazi u diskusiji vijećnika Aliefendića, kada je govorio o spajanju dva komunalna preduzeća, zatim u neracionalnom povećanju broja zaposlenih u novom preduzeću, te u neambicioznosti nekih ranijih uprava preduzeća u iznalaženju novih izvora prihoda i neproširivanju usluga. Rekao je da aktualna uprava ima za cilj nastavak pozitivnih trendova, prepoznatih od strane vijećnika, te je nastavak pozitivnog poslovanja u 2019. godini, koje će biti ostvareno u ovoj poslovnoj godini.

Džihad Berbić: je pojasnio obaveze po ovom kreditu i rekao da je godišnji anuitet 800.000 KM, da je od toga Općina svoj dio od 200.000 KM izmirila, dok je preostalo za izmirenje 600.000 KM. Prema tome u Budžetu za narednu godinu treba predvidjeti obavezu plaćanja duga iz ove godine i anuitet za 2019. godinu što ukupno iznosi 1.400.000 KM.

Općinski načelnik: je istakao da je obaveza lokalne zajednice da se brine o komunalnoj higijeni i vodosnabdjevanju, te da je u općini Kakanj to na zadovoljavajućem nivou. Naglasio je da stanje općinskog Budžeta omogućava preuzimanje otplate kredita od strane Općine, ali isto tako je bila obaveza JP da se pripremi za otplatu kredita, pa su u tom pravcu i poduzimane mjere od strane Vijeća i donošene odluke o povećanju cijene vode i odvoza smeća. U ovom trenutku se postavlja pitanje jesu li te mjere bile ispravne i svrsishodne, odnosno ima li prostora da se cijene vrte na neke ranije iznose. Naglasio je da je u poslovanju JP „Vodokom“ neophodan veći i kreativniji angažman uprave, čak i u vidu pružanja usluga van općine Kakanj, zatim istrajavanje na povećanju produktivnosti radne snage, aktivnosti na kvalitetnom zapošljavanju i penzionisanju onih koji nisu u mogućnosti da odgovore zahtjevima novog pristupa u poslovanju JP. Istakao je značaj ovog JP za društvenu zajednicu i napomenuo da je Općina učestvovala i finansiranju drugih JP i JU, pa je napomenuo proširenje mreže gradskog grijanja, izgradnja nove sportske dvorane i dr. Također je rekao da se treba nastaviti sa aktivnostima u pokušaju da se predmetni kredit otpiše.

Predsjedavajući je dao pauzu od 5 minuta.

Edin Aliefendić: je u ime Kluba SDA predložio da Vijeće Informaciju primi k znanju sa zaključkom kojim bi se formirala komisija sa zadatkom izmjene svih akata vezanih za KfW kredit i utvrđivanje prijedloga akata kojima će obaveza otplate KfW kredita preći na Općinu Kakanj. U Komisiju je predložio: Edin Aliefendić - predsjednik, Rešad Merdić, Rizah Haračić, Ivica Petrović, Eldin Mijoč, Džihad Berbić i Nermin Gačić.

Ahmed Begić: je rekao da Klub SDP-a neće dati svoga predstavnika Eldina Mioča u predloženu komisiju, iz razloga što iste niko nije konsultovao o kandidatu za komisiju.

Predsjedavajući je naglasio da će se vijećnici prvo izjašnjavati o Informaciji o stanju obveza JP „Vodokom“ prema KfW kreditu, pa ukoliko ista dobije potrebnu većinu, onda će se glasati o predloženim zaključcima i prijedlogu za imenovanje Komisije.

Informacija o stanju obveza JP „Vodokom“ prema KfW kreditu je primljena k znanju sa 23 glasa za, 2 protiv i bez glasova uzdržan.

Predsjedavajući je zatražio od vijećnika Aliefendića da ponovo pročita zaključke usaglašene na pauzi i pojasni način predlaganja članova Komisije.

Edin Aliefendić: je rekao da je na pauzi usaglašeno da se formira komisija iz reda predstavnika Vijeća, Općine – Služba za finansije i predstavnika JP „Vodokom“, te da u Komisiju predlože: Edin Aliefendić - predsjednik, Rešad Merdić, Rizah Haračić, Ivica Petrović, Eldin Mijoč, Džihad Berbić i Nermin Gačić, sa zadatkom izmjene svih akata vezanih za KfW kredit i utvrđivanje prijedloga akata kojima će obaveza otplate KfW kredita preći na Općinu Kakanj.

Ivica Petrović: je rekao da se bez razloga vodi rasprava ko se nalazi u Komisiji i ispred koga. Rekao je da su u Komisiju predloženi i predstavnici Općine i Vodokoma, te da je vijećnik Mioč predložen kao pravnik Vodokoma.

Eldin Mioč: je naglasio da ne želi biti član predložene Komisije, ukoliko je predložen kao predstavnik SDP-a, ali je spreman biti član Komisije ukoliko se tu nalazi kao radnik Vodokoma, obzirom da mu je to dužnost i profesionalna obaveza.

Predsjedavajući je kontaktovao da će se vijećnici izjašnjavati na sastav komisije predložen od strane vijećnika Aliefendića.

Vijeće je imenovalo Komisiju za izradu prijedloga izmjena svih odluka vezanih za otplatu KfW kredita, na način da se obaveza otplate KfW kredita prebaci na Općinu Kakanj, u sastavu: Edin Aliefendić - predsjednik, Rešad Merdić, Rizah Haračić, Ivica Petrović, Eldin Mijoč, Džihad Berbić i Nermin Gačić – članovi, sa 20 glasova za, 2 protiv i 4 uzdržana.

Tačka 17.

Prijedlog zaključka o usvajanju Izvještaja o realizaciji Godišnjeg programa rada JU za predškolski odgoj i obrazovanje „Mladost“ Kakanj za 2017/18 godinu

Predlagač: UO JU za predškolski odgoj i obrazovanje „Mladost“ Kakanj

Obrađivač: UO JU za predškolski odgoj i obrazovanje „Mladost“ Kakanj

Izjavitelj: Helmina Murtić, direktorica i Mirsada Čaluk, predsjednica UO JU

U diskusiji nije niko učestvovao, pa je Vijeće usvojilo Izvještaj o realizaciji Godišnjeg programa rada JU za predškolski odgoj i obrazovanje „Mladost“ Kakanj za 2017/18 godinu, sa 24 glasa za, bez glasova protiv i uzdržan.

Tačka 18.

Prijedlog zaključka o davanju saglasnosti na Godišnji program rada JU za predškolski odgoj i obrazovanje „Mladost“ Kakanj za 2018/19 godinu

Predlagač: UO JU za predškolski odgoj i obrazovanje „Mladost“ Kakanj
Obrađivač: UO JU za predškolski odgoj i obrazovanje „Mladost“ Kakanj
Izjavitelj: Helmina Murtić, direktorica i Mirsada Čaluk, predsjednica UO JU za predškolski odgoj i obrazovanje „Mladost“ Kakanj

U diskusiji nije niko učestvovao, te je Vijeće dalo saglasnost na Godišnji program rada JU za predškolski odgoj i obrazovanje „Mladost“ Kakanj za 2018/19 godinu, sa 24 glasa za, bez glasova protiv i uzdržan.

Tačka 19.

Prijedlog odluke o razrješenju Kristine Šain, članice OIK-a, na lični zahtjev

Obrađivač: Stručna služba za poslove Općinskog vijeća

S obzirom da nije bilo prijavljenih diskutanata, Vijeće je usvojilo Odluku o razrješenju Kristine Šain, članice OIK-a, na lični zahtjev, sa 23 glasa za, bez glasova protiv i 1 uzdržan.

Tačka 20.

Prijedlog odluke o objavljivanju javnog oglasa za imenovanje člana OIK-a

Obrađivač: Stručna služba za poslove Općinskog vijeća

U diskusiji nije niko učestvovao i Vijeće je usvojilo Odluku o objavljivanju javnog oglasa za imenovanje člana OIK-a, sa 24 glasa za, bez glasova protiv i 1 uzdržan.

Tačka 21.

Prijedlog odluke o razrješenju Mahira Neimarlije, člana Skupštine JP „Grijanje“ d.o.o. Kakanj, na lični zahtjev

Obrađivač: Stručna služba za poslove Općinskog vijeća

S obzirom da nije bilo prijavljenih diskutanata, Vijeće je usvojilo Odluku o razrješenju Mahira Neimarlije, člana Skupštine JP „Grijanje“ d.o.o. Kakanj, na lični zahtjev, sa 21 glasom za, bez glasova protiv i 3 uzdržana.

Tačka 22.

Prijedlog odluke o imenovanju člana Skupštine JP „Grijanje“ d.o.o. Kakanj na privremeni period do konačnog imenovanja

Predlagač: Komisija za izbor i imenovanje

Obrađivač: Stručna služba za poslove Općinskog vijeća

Izjavitelj: Edin Aliefendić

U diskusiji nije niko učestvovao, pa je Vijeće usvojilo Odluku o imenovanju Amela Gačića za privremenog člana Skupštine JP „Grijanje“ d.o.o. Kakanj, do konačnog imenovanja, sa 17 glasova za, 3 protiv i 5 uzdržanih.

Predsjedavajući je zaključio rad 23. sjednice Općinskog vijeća u 13:05 sati.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog Zapisnika.

**SEKRETAR
OPĆINSKOG VIJEĆA**
Ferdo Mijač

**PREDSJEDAVAJUĆI
OPĆINSKOG VIJEĆA**
Slaven Katičić